

Sermip erngullu niuernermi atorneqarneri pillugit Inatsisartut inatsisissaattut siunnersuut

(Nunanut allanut, Inuussutissarsiornermut, Aatsitassanullu Naalakkersuisoq)

Saqqummiussissut

(Nunanut allanut, Inuussutissarsiornermut, Aatsitassanullu Naalakkersuisoq)

Siullermeerineq

Sermip erngullu niuernermi atorneqarneri pillugit Inatsisartut inatsisissaattut siunnersuut, Naalakkersuisut sinnerlugit matumuuna saqqummiuppara.

Suliat suliarineqartarnerat pitsaanerulersissallugu, aamma sermip erngullu niuernermi atorneqarneqarnissaat siunertaralugu misissueqqaarnissap, avammullu tunisinissap siumut nalorninangitsumik malittarisassiuunneqarnissaa tunngavississallugu, Inatsisartut inatsisissaattut siunnersuut manna siunertaqarpoq. Ingerlatsisut amerlanerusut soqutiginnilersissallugit, suliallu suliarineqartarnerat pitsaanerulersissallugu inatsisissatut siunnersuut aaqquissuunneqarpoq.

Atuinissamut akuersisummik tunniussisoqarsinnaassappat suliniut teknikkikkut, aningaasaqarnikkullu ingerlanneqarsinnaasoq qinnuteqartup qularnarunnaarsissagaa maanna piumasaqaataalissaaq. Misissueqqaarnissamut immikkut akuersisummik tunniussisoqarneranit ukiup siulliup iluani misissueqqaarneq aallartinneqassaaq. Suliniutinut piviusunngortinneqarsinnaanngitsunut imaluunniit imminut akilersinnaanngitsunut akuersissutinik tunniussinnginnissaa illersornissaa matumani siunertaavoq.

Piginnittussaataitaasut siunissami Kalaallit Nunaanni pisortani oqartussamut aningaasanik ersarinnerusumik taasanik akiitsoqarsinnaassanngitsut siunnersuutigineqarpoq, tamanna ingerlatsinermut akuersisummut tunngasumut sunniuteqarsinnaasumik aningaasatigut ajornartorsiuteqarnermik ersiutaasinnaammat. Innersuussutigineqarpoq, piginnittussaataitaasoq imaluunniit taassuma aqutsisui peqquserlussimanermut, imminut paarititanik peqquserluuteqarsimanermut, allat sinnerlugit iliuseqarsinnaatitaanermi peqquserlussimanermut, akiitsoqarluni peqquserlussimanermut, akileraarutitigut peqquserlussimanermut, pinerlunnikkut aningaasarsianik malunnarunnaarsaasimanermut, allatigulluunniit aningaasatigut peqquserlussimanernut eqqartuussaasimassanngitsut.

Misissueqqaarnerit, misissoqqissaarnerit, atuinerlu eqqarsaatigalugit pinngortitamut kingunissaanik naliliinerit suliap suliarineqarneranut ilaassasoq, inatsisissatut siunnersuutitigut ilanngunneqarpoq. Naliliinerimi tassani nunamut, kangerlummumut, immamut kiisalu pinngortitamut kingunerisinnaasai ilanngunneqassapput. Ilangullugu

siunnersuutigineqarpoq, avatangiisinik iluarseeqqinnissamut piginnittussaataasup
aningaasatigut qularnaveeqqusiisinaanissaanik piumasaqaasiortoqassasoq.

Taamatut oqaaseqarlunga, siunnersuut Inatsisartuni kajumittumik suliassanngorlugu
Naalakkersuisut sinnerlugit tunniuppara.